



# **REGULLORE PËR REGJISTRIMIN E KLUBEVE TË PINGPONGUT DHE TË ANËTARËVE TË TYRE**

Në përputhje me nenin 15 paragrafi 2.1 të Statutit të Federatës së Pingpongut të Kosovës të datës 10 nëntor 2020, Federata e Pingpongut e Kosovës, në mbledhjen e datës: 22/09/2022 miratoi këtë:

## **REGULLORE PËR REGJISTRIMIN E KLUBEVE TË PINGPONGUT DHE TË ANËTARËVE TË TYRE**

### **I. PARIME TË PËRGJITHSHME**

#### **Neni 1.**

Me këtë Rregullore, rregullohet mënyra dhe kushtet për regjistrimin e klubeve të pingpongut dhe të anëtarëve të tyre, e drejta e paraqitjes, kalimi i lojtarit nga një klub në tjetrin, shkuarja e lojtarit në botën e jashtme, licencat e lojtarëve, fuzionimi-bashkimi i klubeve, fshirja nga regjistri, puna e Komisionit për regjistrim, mënyra e mbajtjes së evidencës, si dhe çështje të tjera të rëndësishme për regjistrim.

#### **Neni 2.**

Me aktin e regjistrimit klubet dhe anëtarët e tyre e fitojnë të drejtën për t'u paraqitur në garat e pingpongut, në vitin garues për të cilin janë regjistruar. Lojtari, i cili nuk është regjistruar në FPPK, nuk mund të paraqitet në çfarëdo gare që është në kompetencë të FPPK-së, përveç lojtarëve shtetas të Kosovës, të cilët janë të regjistruar në klubet e jashtme dhe të cilët sipas dispozitave të ITTF-it mund të paraqiten për përzgjedhjen e Kosovës. Kohëzgjatjen e vitit garues e cakton Bordi ekzekutiv i FPPK-së.

### **Neni 3.**

Regjistrimin e klubeve dhe të anëtarëve të tyre e bën komisioni për regjistrim i FPPK-së. Regjistrimi bëhet në kohën pas përfundimit të vitit garues afat të cilin e përcakton Bordi. Përgjatë tërë vitit garues, mund të bëhet ripërtëritja e regjistrimit dhe regjistrimi i parë i lojtarëve të lirë dhe lojtarëve të huaj. Lojtarët e regjistruar pas afatit për regjistrim mund të marrin pjesë në gara vetjake pas 3 ditësh, ndërsa pas 7 ditësh në garat ekipore.

### **Neni 4.**

Me rastin e paraqitjes së kërkesës për regjistrimin e klubeve dhe të anëtarëve të tyre, si dhe për vazhdimin e regjistrimit paguhet taksa e regjistrimit, e cila është e ardhur burimore e FPPK-së. Lartësinë e taksës së regjistrimit e cakton Bordi ekzekutiv i FPPK-së. Bordi përcakton edhe lartësinë e pagesës së regjistrimit të lojtarëve pas afatit të parë.

### **Neni 5.**

Klubet mundën, që me ekipet dhe lojtarët e tyre, të paraqiten vetë nëse e kanë regjistrimin e rregullt për atë stinor garues, gjë që e dëshmojnë me dokumentet e vërtetuara. Për çdo lojtar të regjistruar lëshohet vërtetimi libere e garave, në të cilën shënohet data e regjistrimit, përkatësisht ripërtëritjes së regjistrimit dhe datën kur lojtari i caktuar e fiton të drejtën për të luajtur minimumi 7 ditë pas regjistrimit në ndeshje ekipore, 3 ditë në ndeshje individuale. Vërtetimi garues nuk është i vlefshëm pa kontrollimin e mjekut.

## **II. REGJISTRIMI I KLUBEVE**

### **Neni 6.**

Kërkesën për regjistrim ose për ripërtëritjen e regjistrimit, klubi ia parashtron Komisionit për regjistrim të FPPK-së në dy kopje. Kërkesa për regjistrim ose për ripërtëritjen e regjistrimit duhet të përmbajë patjetër: Emrin e klubit, vendin dhe adresën e selisë së klubit, emrin, adresën dhe numrin e telefonit të personave përgjegjës (kryetari, sekretari) dhe personave të autorizuar për kontakte me FPPK-në.

### **Neni 7.**

Për regjistrimin e parë të klubit është e nevojshme të bëhen:

- Aplikacioni për anëtarësim me obligim të pranimit të veprimit në pajtim me statutin e FPPK-së, me Rregulloret dhe vendimet e organeve të FPPK-së,
- Certifikata apo kopja e noterizuar e regjistrimit të OJQ-së
- Certifikata apo kopja e noterizuar e Numrit Fiskal
- Akti i themelimit, me së paku pesëmbëdhjetë (15) persona fizik të moshës madhore (mbi 18 vj.)
- Statuti i klubit / shoqatës me vulë dhe nënshkrim
- Përfaqësuesi i autorizuar i klubit / shoqatës nga Departamenti për OJQ
- Vërtetimi / vendimi për regjistrimin e klubit në komunën përkatëse
- Vërtetimi për shlyerjen e detyrimeve tatimore nga ATK-ja

- Aplikacioni për regjistrimin e së paku 6 lojtarëve të cilët nuk janë udhëheqë të klubit ose trajnerë,
- Dokument identifikues personal të lojtarëve
- Listën e anëtarëve në detyrat udhëheqëse dhe listën e trajnerëve.
- Fletë lëshimin nga klubi i deritashëm për lojtarët nën moshën 21 vjeçare që ndërrojnë klubet
- Dëshminë që klubi i përmbush kushtet për t'u marrë me veprimtari sportive të përcaktuar me Ligjin mbi sportin.
- Llogarinë bankare të klubit
- Të gjitha këto në formë elektronike kur FPPK të ofrojë një platformë digjitale

### **Neni 8.**

Çdo vit klubi duhet ta bëjë ri-regjistrimin. Për ri-regjistrimit të klubit plotsohet:

- Aplikacioni për vazhdimin e antarësisë,
- Aplikimi për regjistrimin e së paku 6 lojtarëve.
- Dokument identifikues personal të lojtarëve.
- Fletë lëshimin nga klubi i deritashëm për lojtarët nën moshën 21 vjeçare që ndërrojnë klubet
- Plotësimin e dokumentacionit nga neni 7 nëse ka mungesa
- Të gjitha këto në formë elektronike kur FPPK të ofrojë një platformë digjitale

### **Neni 9.**

Komisioni për regjistrim është i obliguar që brenda 30 ditëve nga data e pranimit të kërkesës ta bëjë regjistrimin. Nëse regjistrimi nuk është bërë, Komisioni për regjistrim është i obliguar që ta informojë klubin në afat prej 30 ditëve nga data e pranimit të kërkesës, për arsyet e mospranimit të regjistrimit.

### **Neni 10.**

Klubi, përkatësisht lojtari janë të obliguar, që në afat prej 7 ditësh nga marrja e vendimit pozitiv të Komisionit për regjistrim, ta paguajnë taksën e caktuar për regjistrim (dhe për vazhdim të regjistrimit). Klubi përkatësisht lojtari (nëse ka të bëjë me regjistrimin e mëvonshëm individual) nuk kanë të drejtë të lojës derisa të mos e paguajnë taksën për regjistrim, respektivisht 3 ditë për garat individuale dhe 7 ditë për garat ekipor. Nëse obligimi i lartpërmendur nuk është plotësuar as në afatin prej 30 ditëve, do të konsiderohet se vendimi për regjistrimin e klubit, apo lojtarit as që është bërë, gjegjësisht që e tërë procedura as që ka filluar.

### **Neni 11.**

Për të gjitha ndryshimet me rëndësi për regjistrim, të cilat janë bërë gjatë rrjedhës së vitit garues, klubet janë të obliguara që ta informojnë Komisionin për regjistrim në afat prej 10 ditëve nga ndryshimi i bërë.

## **Neni 12.**

Kur bëhet bashkimi i dy ose më shumë klubeve, klubi i porsaformuar regjistrohet në pajtim me dispozitat e nenit 7 të kësaj Rregulloreje. Klubi i krijuar në këtë mënyrë (me bashkim) nuk do të mund të regjistrohet derisa klubet që bashkohen të mos i kenë kryer të gjitha obligimet.

## **Neni 13.**

Në rast të ndryshimit të emrit, klubi paraqet:

- Kërkesën për ndërrimin e emrit, duke shënuar emrin e vjetër dhe të riun,
- Vendimin e organit të klubit, i cili është kompetent për ndërrimin e emrit,
- Fotokopjen e vërtetuar mbi regjistrimin me emër të ri në regjistrin e DOJQ-së.
- Klubi ka të drejtë të vendos emrin e sponsorit si pjesë të emrit të tij, pas marrjes së aprovimit nga Bordit ekzekutiv.

## **Neni 14.**

Klubi, i cili për vitin rrjedhës nuk e bën regjistrimin nuk mund të paraqitet në asnjë nivel të garave që është në kompetencë të FPPK-së.

## **Neni 15.**

Klubi do të shlyhet nga evidenca e FPPK-së nëse nuk e dorëzon kërkesën për vazhdimin (ripërtëritjen) e regjistrimit në afat prej një vit nga data e regjistrimit të fundit.

## **III. REGJISTRIMI I GARUESVE**

### **Neni 16.**

Si garues mund të regjistrohen të gjithë shtetasit e Kosovës, të cilët janë anëtarë të njërit nga klubet e pingpongut të Kosovës.

Me pajtimin e lidhjeve të tyre nacionale mund të regjistrohen edhe shtetasit e huaj anëtarë të klubeve të pingpongut të Kosovës.

Vendimin për afatet për procedurën e regjistrimit për vitin e ardhshëm e bën Bordi ekzekutiv i FPPK-së në fillim të çdo viti rrjedhës.

#### **a) Regjistrimi i parë**

### **Neni 17.**

- Me kërkesën për regjistrim të parë, Komisionit për regjistrim i dorëzohet:

- Deklarata e nënshkruar për anëtarësim në klub, (te personat e mitur bashkë nënshkrimin e prindit-kujdestarit),
- Fotografia me madhësi 3x4 cm, jo më e vjetër se 6 muaj,
- Deklarata me shkrim se deri më tani nuk ka qenë i regjistruar,
- dokumenti identifikues personal te lojtarit

## **b) Ripërtëritja e regjistrimit**

### **Neni 18.**

Ripërtëritje e regjistrimit të garuesit llogaritet regjistrimi i serishëm për klubin e njëjtë për të cilin lojtari ka qenë i regjistruar në vitin garues që i ka parapri vitit për të cilin regjistrohet.

### **Neni 19.**

Përveç regjistrimit të lojtarit në fillim vit, lejohet edhe Kalimi i lojtarit nga klubi në klub i cili bëhet në afatin kalimtar në mes të dy sezoneve gjatë një viti të njëjtë garues sipas fletë-lëshimit nga klubi aktual, pas marrëveshjes me lojtarin/en për kalim e tij/saj në klubin e tjetër.

Afati kalimtar, lejohet ndërmjet dy sezoneve, bazuar në vendimin paraprak të bordit ekzekutiv, i cili mund të mundëson afat 21 ditor për transferim të lojtarëve .

Në rast të kontestit rreth flete kalimeve në mes të klubeve dhe lojtarëve, Komisioni i regjistrimit do të merr vendim meritor i cili do të buron nga obligimet e parapara në kontratën lojtar/klub.

### **Neni 20.**

Për çdo vit të ardhshëm garues lojtari i moshës mbi 21 vjeçare mund të nënshkruajë fletëkalimin për cilindo klub sipas dëshirës së tij pa fletëlëshimin e klubit të deritashëm.

Të gjitha obligimet në relacionin klubi-lojtari zgjidhen me kontratën e ndërsjellë qytetar, në të cilën përcaktohet mënyra e angazhimit si dhe kushtet e ndërprerës së kontratës.

### **Neni 21.**

1. Në rast se lojtari e nënshkruan fletëkalimin për më shumë klube, do të regjistrohet për klubin i cili e ka fletëkalimin me datën më të hershme, me ç'rast si e plotfuqishme merret data e protokollit nëse fletëkalimi është dërguar fizikisht në FPPK. Përfundimisht nga kjo mund të jetë vetëm marrëveshja, ndërmjet klubeve të interesuara dhe lojtarëve, e vërtetuar te protokolluesi publik.
2. Lojtarëve kosovarë të regjistruar në klubet kosovare iu mundësohet regjistrimi dhe pjesëmarrja edhe në ligat e shteteve tjera njëkohësisht, me kushtin që ata nuk

mund të refuzojnë ftesën e Përfaqësueses për kampe, grumbullime apo gara ndërkombëtare dhe nëse kjo ndodh atëherë rasti disiplinor iniciohet nga Drejtori i Përfaqësueses apo Bordi Ekzekutiv në Komisionin Disiplinor.

### **c) Regjistrimi i lojtarëve të huaj për klubet kosovare**

#### **Neni 22.**

Për t'u bërë regjistrimi i shtetasit të huaj për klubin e Kosovës Komisionit për regjistrim duhet t'i dorëzohet:

- Fletë kalimi i nënshkruar me dorë klubit për të cilin dëshiron të regjistrohet lojtari i caktuar deri në afatin e vërtetuar (sipas nenit 16) të kësaj Rregulloreje,
- Leja e Federatës së huaj nacionale, deri në afatin që e cakton bordi.
- Pagesa e taksës së përcaktuar nga bordi për lojtarët e huaj.

#### **Neni 23.**

Lojtari i huaj do të jetë i regjistruar për klubin e Kosovës edhe në rast se leja e federatës së huaj nacionale vjen edhe pas datës që e cakton bordi, por me të drejtë të paraqitjes për klubin vetëm pas 30 ditësh në garat ekipore e pas 15 ditësh në garat individuale.

#### **Neni 24.**

Lojtari i huaj, i cili e merr shtetësinë kosovare pas mbarimit të afatit kalimtar nuk ka të drejtë të paraqitet në garat që janë në kompetencë të FPPK-së gjatë vitit rrjedhës garues dhe deri në fund të vitit mund të bëjë gara vetëm si lojtar i "huaj". Klubi mund të ketë më shumë lojtarë të huaj të regjistruar, por të drejtë paraqitjeje në ndeshjen ekipore në kompetencë të FPPK-së ka vetëm një lojtar i huaj.

## **IV. KOMPENZIMI ME RASTIN E KALIMIT TË LOJTARIT NGA NJË KLUB NË TJETRIN**

#### **Neni 25.**

Lojtarët, në Kosovë, mund të kalojnë nga klubi në klub lirisht çdo vit në afatin e caktuar kohor saktësisht, në pajtim me këtë Rregullore.

#### **Neni 26.**

FPPK-ja e vërteton të drejtën e klubit që me rastin e kalimit të lojtarit të tij në klubin tjetër mundet të kërkojë dëmshpërblim për mjetet e investuara për zhvillimin e tyre derisa kanë qenë anëtarë të klubit në kategoritë e grup-moshave të reja. Dëmshpërblimi mund të kërkohet te secili kalim i lojtarëve deri U19 të cilët në klub kanë kaluar së paku dy vite dhe vetëm te kalimi i parë i lojtarit U21 nga klubi në të cilin i ka kaluar dy vitet e fundit si junior.

Klubi për të vërtetuar të drejtën e tij duhet të dorëzojë së bashku me kërkesën edhe kontratën e ndërsjellët me lojtarin përkatës.

### **Neni 27.**

Vlerat e dëmshpërblimit janë dhënë në tabelën e cila është pjesë përbërëse e kësaj Rregulloreje dhe është shprehur në pikë. Vlerën e pikës për afatin e përmendur kalimtar e cakton Bordi ekzekutiv i FPPK-së në mbledhjen e tij njëkohësisht kur vendoset edhe për afatet e kalimit.

<b>Ranglista</b>	<b>U15</b>	<b>U19</b>	<b>U21</b>
<b>E Kosovës</b>			
1-5	800	1000	1200
6-10	400	500	600
11-20	200	250	300
<b>E Evropës</b>			
1-10	3000	6000	15000
11-20	1500	4000	10000
21-30	1000	3000	6000
30-50		2000	5000
51-100			3500

Nëse lojtari është lojtarë në më shumë kategori merret për bazë ranglista nga moshën momentale e lojtarit.

## **V. KALIMI I LOJTARËVE NË KLUBET E HUAJA**

### **Neni 28.**

Që një lojtar i Kosovës të mund ta marrë lejen nga FPPK-ja për të luajtur në Botën e jashtme, duhet t'i plotësojë këto kushte:

- Të nënshkruajë kontratën për obligimet ndaj përzgjedhjes së Kosovës,
- T'ia paguajë dëmshpërblimin klubit nga i cili largohet sipas kushteve nga neni 26 dhe tabelës nga neni 27 i kësaj Rregulloreje.
- Të paguajë taksën në FPPK sipas tabelës së vërtetuar për taksë, e cila është pjesë përbërëse e kësaj Rregulloreje.

### **TAKSA E KALIMIT NË BOTËN E JASHTME**

a) lojtarët të cilët kanë qenë në përbërje në garat ekipore për përzgjedhjen e të rriturve, së paku 2 herë në katër vitet e fundit	200 pikë
b) Lojtarët të cilët janë paraqitur për përzgjedhjen e Kosovës në garat vetjake, së paku 2 herë në katër vitet e fundit	100 pikë
c) Lojtarët të cilët kanë qenë në përbërje në garat ekipore për përzgjedhjen e kadetëve dhe të juniorëve në katër vitet e fundit	100 pikë

Vlerën e pikës e cakton Bordi ekzekutiv i FPPK-së në fillim të vitit garues.

#### **Neni 29.**

Lojtari është i obliguar të paguajë taksën e vërtetuar çdo herë kur kalon nga klubi i Kosovës në klubin e huaj, si dhe në rastet kur angazhohet njëkohësisht në ligat e FPPK-së si dhe në ligat e shteteve tjera.

#### **Neni 30.**

Lojtarët e huaj që paraqiten për klubet e Kosovës nuk janë të obliguar t'i paguajnë FPPK-së taksën për kalim në klubin e huaj.

### **VI. REGJISTRIMI I DYFISHTË**

#### **Neni 31.**

Me qëllim të krijimit të mundësisë së përparimit më të shpejtë të lojtarëve të rinj (juniorëve dhe kadetëve) lejohet regjistrimi i dyfishtë i lojtarëve të kategorive të reja për klubin tjetër me të drejtë të paraqitjes për klubin e ri vetëm në kategorinë e të rriturve, kurse lojtari i njëjtë do ta mbante të drejtën për t'u paraqitur për klubin amë në kategoritë më të reja. Kohëzgjatja e regjistrimit të dyfishtë mund të kufizohet në një vit garues dhe duhet të ripërtërihet në afate të njëjta sikur çdo kalim tjetër.

#### **Neni 32.**

Klubi mund të ketë më shumë lojtarë me regjistrim të dyfishtë, por të drejtë paraqitjeje në ndeshje ekipore në kompetencë të FPPK-së ka vetëm një lojtar me regjistrim të dyfishtë.

### **VII. PROCEDURA E ANKESAVE**

#### **Neni 33.**

Kundër çdo vendimi të Komisionit për regjistrim mund të bëhet kërkesë për rishqyrtim të vendimit në afat 7 ditorë, për të cilën komisioni i regjistrimit shqyrton rastin së bashku me dokumentet shtesë në afat prej 7 ditësh.

#### **Neni 34.**

Ankesa në vendimin e Komisionit për regjistrim i parashtrohet Bordit të Apelit, si shkallë e dytë, në afat prej 30 ditësh nga dorëzimi zyrtar i vendimit të Komisionit për regjistrim. Bordi i Apelit do ta zgjidhë ankesën në afat prej 30 ditëve nga dita e dorëzimit të ankesës.

#### **Neni 35.**



Ankesat e bëra pas afatit nga neni 34, do të konsiderohen të vjetërsuara. Vendimet e Bordit të Apelit për të gjitha ankesat për procedurën e regjistrimit janë përfundimtare.

## **VIII. E DREJTA PËR PARAQITJEN E EKIPIT**

### **Neni 36.**

Lojtarët fitojnë të drejtën e paraqitjes në garat ekipore 7 ditë pas kryerjes së regjistrimit të rregullt kurse 3 ditë për garat individuale. Lojtari i regjistruar e merr librezën e garave me fotografinë personale, e cila duhet të jetë e tillë që në bazë të saj të mund të bëhet identifikimi i lojtarit.

Lojtari është i obliguar që para çdo gare t'ua tregojë librezën e garave personave zyrtarë.

### **Neni 37.**

Në librezën e garave duhet të vihet vërtetimi për vizitën e bërë mjekësore.

Vërtetimi nuk guxon të jetë më i vjetër se sa që është paraparë me Ligjin për sport.

## **IX. KOMISIONI PËR REGJISTRIM**

### **Neni 38.**

Bordi i FPPK-së e emëron Komisionin për regjistrim. Komisioni për regjistrim përbëhet nga tre (3) anëtarë dhe punon në mbledhje, në të cilat mbahet procesverbali. Mandati i komisionit zgjat aq sa zgjat mandati i Bordit, i cili e ka emëruar.

### **Neni 39 .**

Komisioni për regjistrim:

- Bën regjistrimin e klubeve dhe të anëtarëve të tyre dhe për këtë lëshon dokumentacionin gjegjës sipas kësaj Rregulloreje:
- I zgjedh ankesat e shkallës së parë,
- E udhëheqë evidencimin e klubeve dhe lojtarëve,
- E jep pëlqimin për kalimin e lojtarëve në klubet e huaja,

### **Neni 40 .**

Dokumentet e regjistrimit udhëhiqen nga parime publike, të hapura, të sakta dhe të vërteta.

Çdo klub dhe lojtar duhet ta ketë kartonin e tij, në të cilin shënohen të gjitha të dhënat relevante për regjistrimin dhe paraqitjen e lojtarit.

Përveç kopjes fizike, mbahet edhe databaza elektronike me të gjitha shënimet e skanuara dhe elektronike të lojtarëve dhe klubeve

## **X. DISPOZITA PËRFUNDIMTARE**

### **Neni 41 .**

Kjo Rregullore hyn në fuqi 7 ditë pas nënshkrimit nga Kryetari i FPPK-së dhe e njëjta publikohet në faqen zyrtare të Federatës..



Kryetari  
Jeton Beqiri

22-03-2022